

Remaja mengaku salah guna dadah dihantar ke Sekolah Henry Gurney

KUCHING: Seorang remaja lelaki berusia 17 tahun diperintah untuk dihantar ke Sekolah Henry Gurney selepas mengaku bersalah menyalah guna dadah jenis Amphetamine dan Methamphetamine di Mahkamah Majistret di sini, semalam.

Majistret Zubaidah Sharkawi turut memerintahkan pesalah muda itu kekal di sekolah itu sehingga umurnya 21 tahun.

Mengikut pertuduhan, remaja terbabit melakukan kesalahan itu pada 7 Jun tahun ini sekitar jam 2.15 petang di Bahagian Siasatan Jenayah Narkotik Polis Daerah Kuching (NCID) apabila ujian air kencingnya didapati positif kedua-dua dadah.

Di mahkamah sama, seorang lelaki berusia 21 tahun didenda RM2,800 atau penjara tiga bulan jika gagal membayar denda selepas dia mengaku bersalah menyalah guna Methamphetamine dan Amphetamine pada 2019.

Zubaidah turut mengarahkan Revaldo Bujai Phung diletakkan di bawah pengawasan polis untuk tempoh dua tahun.

Lelaki itu melakukan kesalahan dengan memasukkan dadah ke dalam badannya pada 30 April 2019, kira-kira jam 7.50 malam di BSJN IPD Padawan.

Remaja terbabit dan Revaldo kedua-duanya didakwa mengikut Seksyen 15(1)(a) Akta Dadah Berbahaya 1952 (Akta 234), boleh dihukum mengikut Seksyen 15(1) akta sama.

Pertuduhan itu membawa hukuman denda maksimum RM5,000 atau dua tahun penjara dan diletakkan di bawah pengawasan polis untuk tempoh tidak kurang dua dan tidak lebih tiga tahun, jika sabit kesalahan.

Kes dikendalikan pegawai pendakwa ASP Rogayah Rosli, manakala remaja terbabit dan Revaldo tidak diwakili peguam bela.